

**Suliffeqarfimmi piginnaangorsaaqqinnermi akissarsianut tapiissutit, piginnaangorsaaqqinnermut pilersaarut, piginnaangorsaaqqinnermi ikiorsiissutit aamma eqaannerusumik suliffeqarneq pillugit Namminersornerullutik Oqartussat nalunaarutaat nr. 40, 13. december 2001-imeersoq**

Piginnaangorsaaqqinnissamut ikiorsiisarneq pillugu Inatsisartut peqqussutaanni nr. 4, 31. maj 2001-imeersumi § 9, imm. 2, § 12, § 14 aamma § 17 naapertorlugit aalajangersarneqarput:

*Suliffeqarfimmi piginnaangorsaaqqinneq*

**§ 1.** Piginnaangorsaaqqittumik suliffeqarfimmi sungiusaanermi ilinniartitsinermilu suliffeqarfik akissarsiaqartitsissaaq, piginnaangorsaaqqittup suliffeqarfimmi sulineranut naleqqiullugu tiiminut suliffiinut naapertuuttumik.

*Imm. 2.* Akissarsianut aningaasartuutit 20%-iisa 80%-iisalu akornanni annertussuseqartut kommunip suliffeqarfimmut utertillugit akilissavai. Piginnaangorsaaqqittup sulisinnaassusia utertillugit akiligassanik annertussusiliinermi apeqqutaavoq aalajangerneqartassallunilu sivikinnerpaamik sapaatip akunneri sisamakkaarlugit. Suliffeqarfimmi piginnaangorsaaqqinneq aallartitsinnagu kommunip suliffeqarfiullu akornanni erseqqinnerusumik isumaqatigiissusiortoqarsimassaaq.

*Imm. 3.* Piginnaangorsaaqqittup sulisinnaassusia nalilerneqassaaq inuup atugassarititaasut nalinginnaasut tunngavigalugit assigusumi suliffimmi atorfinitsitaasimasup sulinermi pisinnaassusianut naleqqiullugu.

*Piginnaangorsaaqqinnermut pilersaarut*

**§ 2.** Piginnaangorsaaqqinnermut pilersaarutip suliarineqarnissaanut atorneqassapput paasissutissat qinnuteqartup peqqissutsikkut atugarisaanut, ilinniagaqarsimaneranut, inuussutissarsiutigisimasaanut inooqataanermilu atugarisaanut tunngasut.

*Imm. 2.* Piginnaangorsaaqqinnermut pilersaarut kommunip oqartussaasoqarfiit assigiinngitsunik suliallit suleqatigiiffiannut saqqummiussinavaa.

**§ 3.** Piginnaangorsaaqqinnermut pilersaarut neqeroorutinik imaqassaq

1) ilinniagaqarnissamut imaluunniit qaffasinnerusumik ilinniagaqarnissamut ikiorsiinissamik, imaluunniit

2) allamik suliaqalernissamut suliamut allamut ilinniarnissamik, imaluunniit

3) sungiusarneqarnissamik innarluutigisimasinnaasat kingunerisaannut imaluunniit ajoqusernerit kingunerisaannut ikiuutaasinnaasumik.

*Imm. 2.* Piginnaangorsaaqqinnermut pilersaarutip piginnaangorsaaqqinnerup siunertaa paasinarsisissavaa.

*Imm. 3.* Piginnaangorsaaqqinnermut pilersaarutip naammassinissaanut piumasaaqatit ataasiakkaanut tamanulluunniit tunngasut allanngorpata kommunip pilersaarut iluarsaatissavaa.

**§ 4.** Piginnaangorsaaqqittoq eqeersimaarluni piginnaangorsaaqqinnermut pilersaarutip naammassinissaanut peqataassaaq, tamanna tamatumaluunniit ilaa najugaqarfigisap avataani pissangaluarpalluunniit, imaassimanngippat tamanna inuttut ilaqutariittulluunniit atugarisanut tunngatillugu qularnanngitsumik naleqqutinngitsoq.

*Imm. 2.* Najugaqarfigisaaq imm. 1-imi taaneqartoq tassaavoq sumiiffik piginnaangorsaaqqinnermut pilersaarutip suliarineqarnerani piginnaangorsaaqqittup najugaqarfigisaa imaluunniit piginnaangorsaaqqittup nunassiffissamisut toqqagaa.

#### *Piginnaangorsaaqqinnermi aningaasatigut ikiorsiissutit*

**§ 5.** Kommuni piginnaangorsaaqqinnermi aningaasatigut ikiorsiissaaq piginnaangorsaaqqinnermut pilersaarut malillugu piginnaangorsaaqqittup aallartinneraniit tunniussisassallunilu piginnaangorsaaqqittup piginnaangorsaaqqinnermut pilersaarummik malinninnerata nalaani.

*Imm. 2.* Piginnaangorsaaqqittoq piginnaangorsaaqqinnermut pilersaarummik malinnittutut isigineqassaaq piginnaangorsaaqqinnermut pilersaarutip anguniagaanut imarisaanullu akornutaanngitsumik piginnaangorsaaqqinnerup ingerlanera sivikitsumik unitsineqartarsimagaluarpalluunniit.

*Imm. 3.* Piginnaangorsaaqqinnermut ikiorsiissutit kommunip unitsissavai piginnaangorsaaqqinneq naammassippat imaluunniit siusinnerusukkut, piginnaangorsaaqqinneq taamaatinneqarpat

**§ 6.** Piginnaangorsaaqqinnermi aningaasatigut ikiorsiissutit, S.I.K.-p aamma Naalakkersuisut akornanni isumaqatigiissutit malillugit sulisartup ilinniagaqarsimanngitsup tiimimusiaasa minnerpaat 70%-iisut annertutigisunik tiimimut aalajangersimasumik annertussusilerlugit tunniunneqassapput.

*Imm. 2.* Ikiorsiissutit naatsorsorneqassapput tiimit piginnaangorsaaqqittup piginnaangorsaaqqinnermi peqataaffigisaasa amerlassusiat tunngavigalugu, annerpaamillu sap. akunneranut 40 tiimit tunngavigalugit. Piginnaangorsaaqqinnermi aningaasatigut ikiorsiissutit ullut 14-ikkaarlugit kingumoortumik tunniunneqassapput.

*Imm. 3.* Imm. 1 naapertorlugu tiimimut akit annertussusaat ukiut tamaasa 1. april aamma 1. oktober aalajangersarneqartassapput. Naalakkersuisut aamma SIK-p akornanni isumaqatigiissut allannguuteqartillugu tiimimut akit annertussusaat Naalakkersuisunit sapinngisamik piaartumik tamanut saqqummiunneqassapput.

**§ 7.** § 6 tunngavigalugu piginnaangorsaaqqinnermut aningaasatigut ikiorsiissutit kommunip appartissavai

1) inuutissarsiutigalugu sulinermi imaluunniit namminersorluni ingerlatsinermit ukiumut isertitanik kr. 28.000,00-imiit qummut sinneruttunik, imaluunniit

2) sillimmasiisimanermit imaluunniit soraarnerussutisiassanut aaqquissuussinernit ingerlaavartumik tigusartakkanik, ilanngullugit Sulisilluni ajoqusernerit kingunerisassaannut sillimmasiisimik inatsisip Kalaallit Nunaanni atortuulersinneqarnissaanik peqqussut malillugu inuussutissarsiorsinnaassutsimik annaasaqarnermut taarsiissutinit ingerlaavartumik tigusartakkat.

*Imm. 2.* Taamaattoq isertitat imm. 1-imi nr. 2-mi taaneqartut aatsaat ilanngaataassapput inuussutissarsiutigalugu sulinermi aamma namminersorluni ingerlatsinermi isertitat piginnaangorsaaqinnermut aningaasatigut ikiorsiissutit ilanngullugit katillugit piginnaangorsaaqinnerup siorna piginnaangorsaaqqittup sulinikkut isertitarisimasaanit amerlaneruppata.

*Imm. 3.* Isertitat allat pissutigalugit piginnaangorsaaqinnermut aningaasatigut ikiorsiissutit appartinneqassanngillat.

**§ 8.** Ataasiaannartumik aningaasartuutitut pisariaqartunut peqqussummi § 13, imm. 2 naapertorlugu kommunip aningaasartuutigisinnaasaattut isigineqarput pikkorissarnermut akiliut, atuakkat, immikkut suliffimmik aaqqissuussineq.

#### *Eqaannerusumik suliffeqarneq*

**§ 9.** Eqaannerusumik suliffeqarnissamik kommuni neqerooruteqarsimappat akissarsiat sulinermilu atugassarititat allat, ilanngullugu piffissaq suliffissaq, suliaqarfimmut isumaqatigiissutit atuuttut aallaavigalugit aalajangersarneqassapput. Suliaqarfinni isumaqatigiissuteqarfiunngitsuni aallaavigineqassapput suliaqarfiit nallersuunneqarsinnaasut.

*Imm. 2.* Piffissaq tamakkerlugu eqaannerusumik suliffeqarnissamik kommuni neqerooruteqartussaataavoq, atorfeqartup piffissap ilaannaani atorfeqartitaanissani piumanerunngippagu.

#### *Atortuulerfia*

**§ 10.** Nalunaarut manna ulloq 1. januar 2002 atortuulerpoq.

*Namminersornerullutik Oqartussat, ulloq 13. december 2001*

Ole Dorph

/

Martha S. Abelsen